

佛說阿彌陀經導讀

《佛說阿彌陀經》

甲一、釋經題

○『佛』——佛者覺也。自覺、覺他、覺行圓滿。即教主釋迦牟尼佛。

○『說』——說者悅所懷也。佛以度生為本懷。

○『阿彌陀』——梵語阿彌陀。此云無量光、無量壽。彼土之導師也。

○『經』——經者楷定也。義通三世。常者不變。

甲二、釋經文

乙一、序分

丙一、標法會時處

「如是我聞。一時佛在舍衛國。祇樹給孤獨園。」

。如者恆常不變。是者真實不虛。聞者從佛而聞、而如是說。

。如是我聞。機緣和合。親承有在。法會成就。

丙二、引眾同聞

丁一、明類標數

「與大比丘僧千二百五十人俱。」

。比丘者。乞士、破惡、怖魔義也。

。如主有臣。施設無滯。於旁護道。於法無虧。

丁二表位歎德

「皆是大阿羅漢眾所知識。」

。阿羅漢者。應供、殺賊、無生義也。

。位證無生。心是其主。表真修行。須觀無我。

丁三列上首名

「長老舍利弗、摩訶目犍連、摩訶迦葉、摩訶迦旃延、摩訶俱絺羅、離婆多、周利槃陀伽、難陀、阿難陀、羅睺羅、憍梵波提、賓頭盧頗羅墮、迦留陀夷、摩訶劫賓那、薄拘羅、阿耨樓駄。如是等諸大弟子。」

。德高臘重。名為長老。

。感佛深恩。常隨從也。正法久存。須賴僧傳。

丁四、菩薩眾

「并諸菩薩摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。」

。菩薩者。覺有情也。亦云大道心。成就有情。

。此法難遇。菩薩親承。當來必說。令得大利。

丁五、天人眾

「及釋提桓因等。無量諸天大眾俱。」

「及釋提桓因等。無量諸天大眾俱。」

。十方天人。八部修羅。人非人等。無不與會。

丙三、別序（發起序）

「爾時佛告長老舍利弗。從是西方。過十萬億佛土。有世界名曰極樂。其土有佛號阿彌陀。今現在說法。」

。二有一今。實可深信。佛號彌陀。持名妙行。

乙二、正宗分

丙一、廣陳彼土依正妙果以啓信

丁一、依報妙

戊一、徵釋

己一、徵

「舍利弗。彼土何故名為極樂。」

。極樂者。安樂、清泰、安養也。

。莊嚴何等。以徵答問。令識其相。妙不可言。

己二、約能受用釋

「其國眾生。無有眾苦。但受諸樂。故名極樂。」

。欲受大法。先示其益。離苦之性。人皆有之。

己三、約所受用釋

「又舍利弗。極樂國土。七重欄楯、七重羅網、七重行樹。皆是四寶周匝圍繞。是故彼國名為極樂。」

。七科道品。彰顯四德。光化無盡。包容無邊。

。七者七科道品。表皆聖道所攝。四寶者。常樂我淨四德。周匝者。賢聖圍繞也。

戊二、廣釋

己一、別釋所受

庚一、釋生處妙

「又舍利弗。極樂國土。有七寶池。八功德水。充滿其中。池底純以金沙布地。四邊階道。金銀、瑠璃、玻瓈合成。上有樓閣。亦以金銀、瑠璃、玻瓈、磤磢、赤珠、瑪瑙而嚴飾之。池中蓮華大如車輪。青色青光、黃色黃光、赤色赤光、白色白光。微妙香潔。」

。生處潔淨。眾寶所成。清虛無極。體非業報。

庚二、結示佛力

「舍利弗。極樂國土。成就如是功德莊嚴。」

。彌陀大願。今果已成。接引有情。普攝十方。

己二、合釋能受所受

庚一、約五根五塵明受用

辛一、正明

「又舍利弗。彼佛國土常作天樂。黃金為地。晝夜六時。雨天曼陀羅華。其土眾生常以清旦。各以衣祴盛眾妙華。供養他方十萬億佛。即以食時。還到本國飯食經行。」

。天樂者。法音遍布也。雨華者。資具無缺。供養者。菩薩之行。廣修福德。神足難思。不離彼土。供養十方。不假逾時。

辛二、結示

「舍利弗。極樂國土。成就如是功德莊嚴。」
。重重結示。因賅果海。正顯往生。須仗佛力。

庚二、約耳根聲塵明受用

辛一、化有情聲

壬一、鳥音法利

「復次舍利弗。彼國常有種種奇妙雜色之鳥。白鶴、孔雀、鸚鵡、舍利、迦陵頻伽、共命之鳥。是諸眾鳥。晝夜六時。出和雅音。其音演暢。五根、五力、七菩提分、八聖道分。如是等法。其土眾生。聞是音已。皆悉念佛、念法、念僧。」此方教體。實以音聞。四悉皆入。念佛法僧。

壬二、徵釋略顯

「舍利弗。汝勿謂此鳥實是罪報所生。所以者何。彼佛國土無三惡道。舍利弗。其佛國土尚無惡道之名。何況有實。是諸眾鳥。皆是阿彌陀佛欲令法音宣流。變化所作。」

。普門示現。令悟平等。為利教化。全事成佛。

辛二、化無情聲

「舍利弗。彼佛國土。微風吹動。諸寶行樹及寶羅網。出微妙音。譬如百千種樂。同時俱作。聞是音者。自然皆生念佛、念法、念僧之心。」
。無情有情。同宣妙法。法界一相。共證無生。

庚三、結示

「舍利弗。其佛國土。成就如是功德莊嚴。」

丁二、正報妙

戊一、徵釋名號

己一、徵

「舍利弗。於汝意云何。彼佛何故號阿彌陀。」

。特徵名號。令眾深信。一心執持。無復疑貳。

己二、釋

庚一、約光明釋

「舍利弗。彼佛光明無量。照十方國無所障礙。是故號為阿彌陀。」

。光徧十方。寂而常照。徹證性體。隨願滿成。

庚二、約壽命釋

「又舍利弗。彼佛壽命及其人民。無量無邊阿僧祇劫。故名阿彌陀。」

。壽窮三際。照而常寂。法藏願王。果成如願。

戊二、別釋主伴

己一、別釋

庚一、主

「舍利弗。阿彌陀佛成佛已來。於今十劫。」

。佛壽無量。今僅十劫。時正未央。普勸往生。

庚二、伴

「又舍利弗。彼佛有無量無邊聲聞弟子。皆阿羅漢。非是算數之所能知。諸菩薩眾。亦復如是。」

。聲聞小機。尚且無邊。大誓願者。多且易也。

己二、結示

「舍利弗。彼佛國土。成就如是功德莊嚴。」

。非自非他。自他不二。故云如是。功德莊嚴。

丙二、特勸眾生應求往生以發願

丁一、揭示無上因緣

「又舍利弗。極樂國土眾生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。」

。阿鞞跋致。此云不退。不墮凡地。殊勝未有。

丁二、特勸淨土殊勝

「舍利弗。眾生聞者。應當發願。願生彼國。所以者何。得與如是諸上善人。俱會一處。」

。羅漢菩薩。但云善人。因地之極。故得曰上。

丙三、正示行者執持名號以立行

丁一、正示無上因果

「舍利弗。不可以少善根福德因緣。得生彼國。舍利弗。若有善男子、善女人。聞說阿彌陀佛。執持名號。若一日、若二日、若三日、若四日、若五日、若六日

若七日。一心不亂。其人臨命終時。阿彌陀佛與諸聖眾。現在其前。是人終時。心不顛倒。即得往生阿彌陀佛極樂國土。」

。信願持名。一一聲中。皆具福德。皆具善根。

。一日至七日者。表持心不亂。正念得生。

丁二、重勸

「舍利弗。我見是利。故說此言。若有眾生聞是說者。應當發願。生彼國土。」
。穢土修行。生死關頭。最難得力。故再重勸。

乙三、流通分

丙一、普勸

丁一、勸信流通

戊一、略引標題

己一、東方

「舍利弗。如我今者讚歎阿彌陀佛不可思議功德之利。東方亦有阿閼鞞佛、須彌相佛、大須彌佛、須彌光佛、妙音佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。」

己二、南方

「舍利弗。南方世界有日月燈佛、名聞光佛、大燄肩佛、須彌燈佛、無量精進佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。」

己三、西方

「舍利弗。西方世界有無量壽佛、無量相佛、無量幢佛、大光佛、大明佛、寶相

佛、淨光佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。」

己四、北方

「舍利弗。北方世界有燄肩佛、最勝音佛、難沮佛、日生佛、網明佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。」

己五、下方

「舍利弗。下方世界有師子佛、名聞佛、名光佛、達磨佛、法幢佛、持法佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。」

己六、上方

「舍利弗。上方世界有梵音佛、宿王佛、香上佛、香光佛、大燄肩佛、雜色寶華嚴身佛、娑羅樹王佛、寶華德佛、見一切義佛、如須彌光佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。」

。甚深難信。六方明證。此無上法。決定往生。

戊二、徵釋經題

「舍利弗。於汝意云何。何故名一切諸佛所護念經。舍利弗。若有善男子、善女人聞是經受持者。及聞諸佛名者。是諸善男子、善女人。皆為一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語。及諸佛所說。」

。聞持憶念。皆得彼益。應當信受。諸佛為證。

丁二、勸願流通

「舍利弗。若有人已發願、今發願、當發願。欲生阿彌陀佛國者。是諸人等皆得不退轉於阿耨多羅三藐三菩提。於彼國土。若已生、若今生、若當生。是故舍利弗。諸善男子、善女人。若有信者。應當發願生彼國土。」

。妙因妙果。不離一心。發願持名。定生淨土。

丁三、勸行流通

戊一、諸佛轉讚

「舍利弗。如我今者。稱讚諸佛不可思議功德。彼諸佛等。亦稱讚我不可思議功德。而作是言：釋迦牟尼佛。能為甚難希有之事。能於娑婆國土。五濁惡世。劫濁、見濁、煩惱濁、眾生濁、命濁中。得阿耨多羅三藐三菩提。為諸眾生。說是一切世間難信之法。」

。但持名號。徑登不退。無藉劬勞。頓修頓證。

戊二、教主結歎

「舍利弗。當知我於五濁惡世。行此難事。得阿耨多羅三藐三菩提。為一切世間說此難信之法。是為甚難。」

。燦字宅裏。戲論紛然。死盡偷心。寶此一行。

丙二、結勸

「佛說此經已。舍利弗及諸比丘。一切世間天人、阿修羅等。聞佛所說。歡喜信受。作禮而去。」

。眾生機熟。令得四益。如時雨化。歡喜信受。

藕益大師：

眾生知見佛知見 如水結冰冰還泮
戒力春風佛日暉 黃河坼聲震兩岸
切莫癡狂向外求 悟徹依然擔板漢